

20
22

ISLA ONLINE
Noticia Transparente di Gobierno

Dialuna 3 October 2022

Email: IslaOnline@gobierno.aw Tel: 528-4952



Gabinete Wever-Croes //



OCTOBER
LUNA DI CONSCIENTISACION DI
CANCER NA PECHO

ISLA
ONLINE

Noticia di Gobierno



Den nomber di Gobierno di Aruba, PROME MINISTER TA EXPRESA PALABRANAN DI PROFUNDO CONDOLENCIA Y FORSA NA FAMIANAN A PERDE SERNAN KERI DEN MANERA TRAGICO



Dialuna mainta, Prome Minister Evelyn Wever-Croes, den nomber di Gobierno di Aruba, a expresa palabranan di profundo condolencia y forsa na famianan cu siman pasa y durante fin di siman a perde sernan kere den manera tragico. Alabes, Prome Minister ta pidi cada ciudadano pa ta mas prudente den tur cos especialmente ora di sali di cas pa pensa cu tin limite y cu cada un di nos tey pa cuida otro.

“E siman aki ta habri nos cu un curason cu hopi dolor, debi na un fin di siman tragico cu nos a pasa aden. Esaki despues cu siman pasa un hoben di apenas 19 aña a perde su bida den un accidente di brommer.

Diadomingo, riba un solo dia, 4 concudadano di nos pais derepente a perde nan bida den sucesonan tragico. Dos ruman muhe hunto. Un a fayece cu su mesun baby di 2 aña y hunto cu ne otro ruman a fayece y hunto lagando yiunan chikito atras. Esta un tristesa profundo pa famianan, cu a perde tres miembro keri di famia, y tin mas miembro di famia, den e caso aki muchanan chikito, cu ta bringando pa nan bida. Un dolor enorme.

Di parti di Gobierno di Aruba nos ta desea famia Wouters y conocirnan, hopi hopi forsa den e momentonan sumamento dificil y doloroso aki.

E accidente tragico ya a cuminsa wordo investiga y mi ta spera cu pronto e raport lo keda cla y si tin hende cu mester para responsabel pa nan acto, husticia lo tuma su curso y atende cu esnan involvi cu lo a causa e accidente horibel aki.

E otro caso tragico cu a shock nos ta di e hoben di 24 aña cu a hoga durante di un Pool Party. E incidente aki tambe na e momento aki ta bao di investigacion y mi ta spera pronto e raport aki tambe keda cla. Gobierno ta manda palabra di condolencia na famianan.

Berdad e investigacionnan ya a inicia, Sinembargo mi mester bisa cu raportnan di investigacion no ta bay alivia e dolornan inmenso di Yiu, Mama, Tata, Wela y demas miembronan di famia.

Nos a drenta awor den e ultimo 3 lunanan di aña 2022. Ta nos deseo cu hunto nos lo pasa e siguiente dia, siman y lunanan cu menos incidente lamentabel posibel. Nos por logra esaki door di sea mas prudente den tur cos cu nos ta haci. Ora cu bo ta riba caminda pensa cu no ta abo so ta riba caminda, cu tin otro auton cu tin miembronan di famia, mama, yiunan, wela welo; ora di sali fiesta nos mester

Pa un isla chikito manera Aruba, tin 4 morto tragico den un fin di siman ta un golpi duro pa nos comunidad. El a afecta ami hopi, mescos cu el a afecta miles di famia na Aruba.

Mi ta pidi pa nos tur uni den curason y resa pa e famianan di e victimanan. Ohala cu nos oracion y sentimentonan di compacion por ta consuelo pa e famianan. Laga nos resa tambe pa esnan cu ta den hospital pa nan pronto recuperacion. Y cu Mirella, Joanne, Rendrick, Daniel y Angel Gabriel sosega na paz den brasa di Señor”.

Prome Minister Evelyn Wever – Croes: A TRAVES DI 'INNOVATION CAMP' MUCHANAN TA SIÑANDO DI INNOVACION DURANTE NAN VACACION

Un bes mas “Innovation Camp” cu ta wordo organisa a traves di Futura a inicia cual ta tumando luga na Imeldakleuterschool. E muchanan cu ta participa lo siña tocante di innovacion durante di e vakantie aki. Prome Minister Evelyn Wever - Croes a bishita e scol pa mira con esaki ta bayendo.

Na e ocasion Prome Minister a tuma nota di un grupo di mucha hopi entusiasmo. E muchanan tabata haciendo un ehercicio den cual nan ta siña di fisica y gravedad cu docentenan di International School. Pa e ehercicio aki e muchanan mester laga un webo cay sin cu esaki ta kibra. Adicionalmente e team di Aruba Aloe tambe tabata presente y a siña e muchanan con pa traha habon.

Prome Minister ta gradici Futura pa e trabou duro cu nan a haci pa logra inicia cu e ‘camp’ y tambe studiantenan di IPA cu ta yuda cu e actividad. Durante e resto di siman lo tin mas actividad planifica y ta spera cu e muchanan por pasa un momento hopi agradabel y siña hopi di diferente tema cu tin di haber cu innovacion.



Prome Minister Evelyn Wever-Croes:

INAUGURACION DI E EDIFICIO CU TA BIRA OFICINANAN DI DIRECTIE OUDERENZAKEN

“Nos grandinan a cuida pa nos tempo cu nos mes tawata chikito y awo ta nos tempo y responsabilidad pa cuida pa nos grandinan”



Diahuebs ulimo a tuma luga na Zoutmanstraat 1, e Inauguracion di e edificio cu ta bira oficinanan di Directie Ouderenzaken. Prome Minister Evelyn Wever-Croes tawata presente y a duna un splicacion di e vision di Gabinete Wever-Croes y e accionnan cu a wordo tuma ya caba desde Gabinete Wever-Croes I.

Den deliberacionnan pa forma gobernacion di Gabinete Wever-Croes II na 2021, a dicidi tambe pa encarga un minister specifico pa asunto nan di adultonan mayor debi principalmente na e vergrijzing y pa duna debido atencion na e necesidadnan y bienestar di nos adultonan mayor. Esaki ta un idea di Minister Ursell Arends kende a sigui traha riba esaki den e prome aña di gobernacion pa asina crea e tranquilidad y bienestar di nos adultonan mayor. Minister Arends tawata tin un bunita vision y a pone accion tras di su palabra cu hopi curashi y determinacion pa asina awo por habri e oficinanan di Directie Ouderenzaken.

“Nos grandinan a cuida pa nos tempo cu nos mes tawata chikito y awo ta nos tempo y responsabilidad pa cuida pa nos grandinan. Y esaki exactamente ta loke Directie Ouderenzaken lo haci. Nos ta aki na ocasion di inicio di celebracion di luna di Adulto Mayor y e traspaso simbolico di e yabi di e edificio nos tras na Zoutmanstraat 1”, Prome Minister a duna di conoce.



Dia 14 di december 1990 Asamblea General di Nacionnan Uni a designa 1 di october como Dia Internacional di Adultonan Mayor. E gobierno aki a bin ta reconoce cu ta su tarea pa garantisa cu nos adultonan mayor mester tin e calidad di bida halto cu nan merece. Den nan hubentud nan a contribui na biennestar di Aruba y awor ta nos turno pa dedica antencion na nan.

Un calidad di bida miho ta abarca diferente aspecto manera: facilidad adecuado pa biba; purba evita biba den isolacion; accesibilidad di nos edificionan; o cuida dedica pa menciona algun.

Continuacion INAUGURACION DI E EDIFICIO....



Den su esfuerço pa garantiza esaki, Gabinete Wever-Croes I, bou maneho di Prome Minister, ya caba a tuma e iniciativa pa bin cu un Raad voor Ouderen (RaVO). Gobierno ta wardando riba e conseho final di DRH pa formalisa e cambio den e constelacion di e secretariado di SER cu lo ta e instancia cu lo duna RaVO e apoyo administrativo mescos cu e ta dunando SER na e momento aki.

E Directie Ouderenzaken cu lo wordo institui awor su tarea lo ta diferente cu RaVO. RaVO lo dirigi riba tereno di beleid mientras e tareanan di Directie Ouderenzaken lo ta mas hands-on cu un envolvimento y intercambio directo cu e adulto mayor.

Gobierno a nuncia recientemente algun decision na beneficio di nos pensionadonan. Entre otro lo baha tarifa di inkomstenbelasting y loonbelasting, hisa e suma cu ta liber di impuesto, aumenta reparatie toeslag pa pensionadonan, den caso cu ta pensionadonan cu ta pareha casa, awo e pension ta wordo conta hunto cerca esun cu tin entrada mas halto. E cambianan aki ta drenta na vigor entrante januari 2023 y lo causa un alivio financiero sumamente grandi pa nos pensionadonan.

“Nos a priminti cu nos lo baha e peso di impuesto y asina poco poco, apesar di tur e retonan financiero cu nos ta enfrenta, nos ta cumpli. Pabien na Minister Uresell arends y tur e ekipo di Directie Ouderenzaken tur clase di exito den nan tarea na bienestar di nos adultonan mayor.

Na final, Prome Minister a recita un dicho di Carroll Bryant: ‘Growing old is mandatory but growing up is optional’. “Esaki sin embargo no ta implica cu nos no por keda pa semper “young at heart”. Prome Minister a enfatisa.



Nos Baluartenan





6 CAS DI CUIDO A RICIBI NAN PERMISO PA OPERA



Durante ceremonia di apertura di Directie Ouderenzaken diabierna 30 di september, a tuma e oportunidad pa haci entrega di permiso na 6 cas di cuidu. Minister Arends a pone como meta cu prome cu fin di aña tur cas di cuidu cu cumpli cu e rekisitonan lo haya nan permiso pa opera. A base di e permiso por haci control riba e calidad di cuidu y bienestar di cliente.

E 6 casnan di cuidu cu a haya permiso ta Stichting Hospice Atardi, Stichting Thuiszorg Aruba, Betesda Home Care, Stichting Cas Cristelle, Zorg met Liefde y Stichting Cas di Machi. Ademá, varios casnan di cuidu ta participa na un proyecto piloto di Ministerio di Asuntonan di Adulto Mayor pa tuma inventarisacion di e retonan y oportunidadnan pa mehoracion encuan to e calidad di cuidu y bienestar di cliente.

Minister Arends ta sumamente orguyoso cu e casnan di cuidu por a presencia e apertura di Directie Ouderenzaken. E colaboracion estrecho entre Directie Ouderenzaken y esnan trahando den e sector ta na e bienestar di adulto mayor. Minister Arends ta gradici tur cas di cuidu cu a duna sosten na e apertura y ta desea un luna di adulto mayor fructifero na un y tur.



Minister Ursell Arends:

PROYECTO PA PROMOVE ACTIVIDADNAN PA ADULTO MAYOR

Inversion den proyecto "Veilige Barrios"



Minister Arends con hunto cu Minister Rocco Tjon y Minister Endy Croes a firma un acuerdo cu CEDE Aruba pa organisacionnan di bario por haya fondo bou capa di e proyecto "Veilige Barrios." Minister Arends ta wak e beneficio pa adulto mayor keda activo den comunidad, pa es motibo a tuma e decision pa aporta fondo cu e meta di reenforza organisacionnan y iniciativanan den bario.

Como Minister di Asuntonan di Adulto Mayor, Minister Arends ta enfoca riba embehecimento activo. Actividadnan den bario ta duna adulto mayor un oportunidad pa forma un sociedad



inclusivo unda tur hende por participa, specialmente esnan sin sociale vangnet. Varios grupo di adulto mayor a forma un fundacion pa mantene laso comunitario pero tur actividad ta depende riba esfuerso di boluntario. E acuerdo firma cu CEDE Aruba ta percura cu e fundacionnan aki por haya sosten necesario pa e siguiente 5 aña.

Minister Arends ta orguyoso di por a aporta na desaroyonan positivo pa loke ta trata formacion social y cultural di nos adulto mayor.

MINISTER ARENDS TA GRADICI HUBILARIONAN DI DIRECTIE SCHEEPVAART ARUBA

Diahuebs 29 di september, riba Dia Mundial Maritimo, Minister Arends hunto cu directiva di Directie Scheepvaart (DSA) a elogia diferente hubilario.

Asina aki a celebra 25 aña den servicio di Pais Aruba di sra. Deta Barrera, sr. Remy Briesen, sr. Ralph Dinzey y sr. Egmond Molina. Alabes a celebra 30 aña di sr. Alexander Henriquez den servicio di Pais Aruba. Por ultimo tambe a gradici Sr. Luis Tromp cu a baha cu pensioen bon mereci pa su dedicacion y amor pa e trabou cu ela desplega durante tur e añanan na DSA.

"Mi ta contento di por a pasa un rato na Directie Scheepvaart riba dia Dia Mundial Maritimo Mundial y celebra esaki cu diferente hubelario", Minister Arends a expresa.

Minister Arends ta gradici full e team di DSA pa nan dedicacion cu nan tin pa nan trabou. Tambe a haci uzo di e oportunidad pa



a vocifera minister su compromiso cu DSA y e sector maritimo pa logra eleva esaki como un sector prometedor den Aruba su economia y alabes garantizando e seguridad den nos awanan y hafnan.



MINISTER MADURO DI FINANSA TA ANUNCIA E 'PLAN DI IMPUESTO 2023' CU TIN COMO META PA YEGA NA UN SISTEMA FISCAL MAS SIMPEL Y HUSTO



Diabierna 30 di september, Minister Maduro di Finansa a anuncia e 'Plan di Impuesto 2023' cu tin como meta pa yega na un sistema fiscal mas simpel y husto. E plan ta encera e recuperacion di Aruba su finansa publico por medio di compensacion, reparticion husto y mehoracion di cumplimiento di impuesto di ciudadano y bishitante. Mas concreto e 'Plan di Impuesto 2023' lo conta cu introduccion di un tarifa nobo di BBO cu ta resulta den un tarifa combina di BBO, BAVP y BAZV di 7%, hunto cu un pakete di compensacion pa individual y negoshi pa yuda mitiga e efectonan di inflacion.

E pakete di compensacion individual ta conta cu un rebaho di 2% riba impuesto di entrada, lo subi e suma liber di impuesto na 30.000 mil florin, lo separa e cobranza di impuesto riba entrada pa pensionado y lo hisa e 'reparatietoeslag' pa pensionado di SVb cu 45 florin. Tur esaki lo yuda baha e peso di impuesto riba esnan mas vulnerabel den comunidad, cual ta nos grandinan

y esnan cu ta ricibi un salario cu ta menos di 2500 florin pa luna. Pa negoshi lo reduci e 'winstbelasting' di 25 pa 22% y lo mantene e 'investeringsaftrek.' Nos bishitantenan lo conoce un subida di e 'toeristenheffing' y lo reparti e fondonan aki na un manera mas husto entre ATA, Gobierno y e fondo di TPEF cu ta pa mehora nos producto turistico. E plan ta conta tambe cu algun cambio pa asina mehora e cumplimiento cu e deber fiscal na nos Pais. Durante full e siman venidero e mandatario lo brinda informacion riba e contenido concreto di e 'Plan di Impuesto 2023' cu ta drenta na vigor 1 di januari 2023.

PLAN DI IMPUESTO 2023
UN SISTEMA SIMPEL Y HUSTO

META



Recuperacion di Aruba su finansa publico por medio di **compensacion, reparticion husto y mehoracion** di cumplimiento di impuesto di tur ciudadano y bishitante.



PLAN DI IMPUESTO 2023
UN SISTEMA SIMPEL Y HUSTO



Ta **introduci** un tarifa nobo di BBO cu ta resulta den un Tarifa combina di BBO, BAVP y BAZV di 7%, hunto cu un Pakete di **Compensacion** pa mitiga inflacion.

Tambe lo tin un **reparticion husto** di entrada y aumento di cumplimiento di impuesto ("Compliance").





A REUNI CU CAMARA DI COMERCIO PA CU ULTIMO DESAROYONAN Ariba ARUBA SU ECONOMIA



Diahuebs 29 di september, a tuma luga e reunion mensual cu Camara di Comercio (KvK) hunto cu Minister di Asuntonan Economico, Comunicacion y Desaroyo Sostenibel, mr. Geoffrey Wever unda ta informa ariba e ultimo desaroyonan pa loke ta trata economia den su totalidad. Manteniendo laso estrecho cu stakeholders clave pa asina guia nos economia den e bon direccion.

Den e reunion mensual a trata e “Vestigingsbeleid” nobo cu a wordo anuncia siman pasa y tambe diferente aspectonan cu ta toca e introduccion di aumento di BBO relaciona cu e reforma fiscal cu ta andando. Alabes a elabora ariba e punto cu entrante januari 2023 lo cuminsa cu e UBO-Register na Aruba. Esaki ta e ‘Ultimate Beneficial Owner Register’ cu ta

bay wordo introduci pa asina sigura cu Aruba ta sigui cumpli cu recomendacionnan internacional di e Financial Action Task Force (FATF).

FATF ta un instancia internacional cu ta monitorea actividadnan criminal di labamento di placa y financiamiento di terrorismo y proliferacion.

E ley concerni pa cu e introduccion di e UBO-Register a pasa parlamento algun luna atras y actualmente ta coordinando esaki conhuntamente cu Camara di Comercio pa defini e ultimo detayesnan prome cu e fecha di introduccion cu ta 1 di Januari 2023.



MINISTERIO DI DEPORTE TA DUNA SOSTEN NA E DI DOS EDICION DI "BASEBALL IN PARADISE"

Cu ta tuma luga dianan 3 pa 8 di october

Diahuebs atardi Minister Endy Croes tabata presente na e conferencia di Prensa di Future Star Baseball Academy cu a lansa e di 2 edicion di e torneo di 'Baseball in Paradise'. E torneo di baseball ta tuma luga di 3 pa 8 di october den diferente stadionnan rond di Aruba. Mas di 3000 persona y 47 ekipo di e.o. Bonaire, Curaçao, Alemania, Santo Domingo, Bahamas y Aruba ta batayando den e tremendo campeonato aki.

E mandatario di Deporte a expresa cu e la compronde di organisado, sr. Shurty Tremus cu aña pasa un total di 300 persona a bin Aruba. E aña aki e acogida pa e torneo ta asina grandi na unda cu mas di 3000 persona ta un siman na Aruba. Mas di 140 wega ta wordo hunga den e siman aki.


Minister Endy Croes a indica cu e vision di Gobierno di Aruba, ta pa promove 'sport tourism' y esaki ta un forma; na unda cu organisadonan mes ta bin cu e iniciativa pa organisa un campeonato di e magnitud aki y ta trece riba 1300 persona entre hungado, mayornan y famia Aruba. Nan ta hospeda den hotel, ta huur auto nan ta keda na Aruba pa un siman, ta duna contribucion na e vision di Gabinete Wever – Croes II. Minister Endy Croes ta gradici Aruba Tourism Authority (ATA) pa duna sosten y aporte. Como tambe e mandatrio ta gradici FFD cu a traha hopi di cerca cu Future Star Baseball Academy cu duna nan aporte enorme na tur e veldnan cu nan ta maneha. E dignatario a gradici e organizacion di Future Star Baseball Academy tanto na Hulanda como na Aruba. Como Minister di Deporte nos ta duna nos sosten na e proyecto bunita aki.

Concluyendo Minister Endy Croes ta invita henter e pueblo di Aruba pa e gran apertura di dos edicion di "Baseball in Paradise" cu ta tuma luga awe tardi pa 5:30 pm na Joe Laveist Sportpark na San Nicolas. Cu e sosten di comunidad lo tin un stadion "sold out" den ambiente di brassband. Ban duna apoyo



y sosten nos muchanan durante e siman aki. Palabran di pabien na organisado! Cu e 4D di deseo, disciplina, dedicacion y determinacion boso ta logra!

MINISTER ENDY CROES A PRESENCIA LANSAMIENTO DI WEBSITE DI TOURISM PRODUCT ENHANCEMENT FUND (TPEF)



Diahuebs anochi den un ceremonia special na Tierra del Sol Minister Endy Croes a presencia lansamento di e website Tourism Product Enhancement Fund (TPEF). Presente na e ocasion special aki tabata Prome Minister Evelyn Wever-Croes, Minister Dangui Oduber, Minister Xiomara Maduro, Minister Geoffrey Wever, Presidente Suplente di Parlamento Raymond Kampervenn y demas invitadonan special. Minister Endy Croes a indica cu evento di TPEF su obhetivo ta pa celebra tur loke TPEF a logra den e ultimo 4 añanan cu e proyecto mas recien cu ta wordo realisa esta e website. Hopi biaha den comunidad no tin un bon bista kico TPEF ta haci of kico e ta encera y ki tur e fondo ta contribui na dje. Cu esaki y den e cuadro di “Good Corporate Governance” a cuminsa na prome luga re-brand e identidad di TPEF cu un logo nobo y alabes lansa un website mañan unda cu tur cu ta interesa sea un compania of fundacion por aplica pa TPEF su fondonan via e website.



Durante e ceremonia special di lansamento di TPEF Minister President Evelyn Wever-Croes, Minister Dangui Oduber, presidente di TPEF, sr. Mario Arends y sra. Sharlyze Romano manager di e proyecto a hiba palabra. TPEF ta un otro inovacion den turismo. E website su Plataforma tambe ta un Plataforma unda cu Gobierno di Aruba por “display” e inversionnan unda cu TPEF a contribui na dje. TPEF aunke ta mas chikito cu ATA ta keda un “player” vital den e industria di turismo, unda cu den diferente comision TPEF tin un stoel na mesa pa asina por sigui contribui na eleva e producto turistico di Aruba.

E board di TPEF ta funcionando cu 6 persona: Manager di Proyecto: sra. Sharlyze Romano, Presidente TPEF, sr. Mario Arends ATA y miembronan di directiva: sr. Jurgen v Schaijk, sra. Sulaika Kelly, sr. Jouel Croes, sra. Shahaira Labad y sra. Sjeidy Feliciano. Concluyendo Minister Endy Croes ta felicita e directiva completo di TPEF como tambe colega Minister Oduber pa su guia y vision.

MINISTER ENDY CROES A ORFRECE UN BUNITA RECEPCION NA HONOR DI E DELEGADONAN DI E CONFERENCIA "STUDIESUCCES CARIBISCHE STUDENTEN"



Dialuna anochi despues di prome dia di e conferencia "Studiesucces Caribische Studenten". Minister Endy Croes a ofrece un bunita recepcion na Surfside Marina pa yama e delegacionnan bon bini na nos dushi isla. Pa prome bes cu e paisnan: Curaçao, Boneiro, Sint Maarten, Sint Eustatius, Saba, Hulanda y Aruba bini hunto pa trata topiconan di interes comun y pa sondea posibilidad pa haya e miho manera pa desaroya programanan di sosten cu medida concreto y structural, pa mas estudiante Caribense por termina nan estudio cu exito.

Den un esfera ameno y special Secretaris General di Onderwijs di Hulanda mw. Drs. Marjan Hammersma a hiba palabra unda a expresa di ta contento con e dia a desaroya. Dr. Viola Heutger, Ron Borhmand y Minister Endy Croes tambe a hiba palabra durante e anochi ameno aki, E delegacionnan por a intercambia informacion alabes socialisa. Cu e 4 C di comunicacion, pensamiento critico, colaboracion y creatividad como nos compas y guia nos lo yega na acuerdonan na bienestar di enseñansa specialmente pa nos studiantenan.



Gabinete Wever - Croes

Continuacion MINISTER ENDY CROES A ORFRECE UN BUNITA RECEPCION....



BISHITA DI CORTESIA DI SUZAN OVERMEER DI KONINKLIJK CONSERVATORIUM NA MINISTER THIJSSEN



Suzan Overmeer, coordinador di e estudio “Docent Muziek” na Koninklijk Conservatorium di Den Haag recientemente a haci un bishita di cortesía na Minister Plenipotenciario Suplente mr. Ady Thijsen.

Durante di e combersacion sra. Overmeer a conta cu na maart ultimo hunto cu e estudiante Arubiano Shannon Bueno a haci un bishita di trabao na Aruba pa haya un bista di e situacion cu docente di musica na Aruba. Despues di a topa y papia cu diferente persona na Aruba a constata cu e nesesidad pa docentenan di musica den educacion musical na Aruba ta hopi grandi. For di Koninklijk Conservatorium a duna presentacionnan na hobennan pa trece nan riba e idea pa un futuro como docente di musica. Segun sra. Overmeer lo ta mas logico si tin hobennan Arubiano cu por wordo educa como docente di musica.

Tambe a keda constata cu lo mester bin sosten na e docentenan di musica cu actualmente ta dunando les na e scolnan na Aruba, cu ta hopi motiva pero cu tiki background pedagogico. Un manera cu por brinda sosten segun señora Overmeer ta pa medio di stage di studiantenan di Koninklijk Conservatorium. Actualmente tin dos estudiante cu ta den tres aña di estudio cu ta interesa pa core stage na Aruba. Mirando cu un stage asina pa un periodo largo ta trece hopi gasto cune. Señora Overmeer a bisa Minister Thijsen cu e ta buscando financiamiento pa haci e stage aki posibel.

E mandatario a bisa cu e ta haya hopi importante e interes for di Koninklijk Conservatorium pa educacion musical na scolnan na Aruba y tambe e intercambio riba e mundo di musica di Aruba, specialmente pa loke ta trata e musica folklórico di Aruba ta positivo. Sr. Thijsen a musta señora Overmeer riba kisas posibilidadnan for di fondonan Europeo. Mirando como cu su persona ta Representante di Aruba na Union Europeo y den e funcion aki tin hopi di haber cu OCTA elo sondea e oportunidadnan cu por tin cu Union Europeo of OCTA por contribui financieramente cu e proyecto aki.

Finalmente señora Overmeer a gradici minister Thijsen pa e combersacion hopi ameno y como recuerdo a haci entrega di un ehemplar di Kunstzone, cu ta un revista riba arte y cultura den enseñansa pa cual su edicion number 5 ta dedica na educacion musical na e islanan Caribense Hulandes.

SINTONISA

CONFERENCIA DI PRENSA DI GOBIERNODI ARUBA



Tur dialuna y diahuebs | 10:00 am

INNOVATION CAMP

STEAM & INNOVATION

Unleash your kid's creativity
through Science, Technology,
Engineering, Art & Math

Registration Fee

AFL **100**

Fun Activity Program

Robotics, Bridge building,
Volcano making, Lego
Stopmotion Video, and much
more!

AGES

7-10

OKTOBER

3-7

8:30 am - 12:30 pm

IMELDA

KLEUTERSCHOOL

De La Sallestraat z/n

FUTURA





Gabinete Wever-Croes II



Goberna- Crisis tras di crisis, reto tras di reto

Cu hopi determinacion, fe y trabou duro,
Gabinete Wever - Croes II ta trahando pa
recupera nos dushi isla Aruba.

Gobierno no por haci esaki su so y ta conta cu
sosten di comunidad pa hunto nos lanta

Aruba